

Timotigö Kimbi 2

Polnön Timotigöra Kimbi aliga 2

ahök.

Jim-asa-asari

Polnön undumji aka gwabö alabaukñi Timotigöra “Andö qambañi qöndökñi wañgimam,” jiba Buña Kimbi ki ohoyök. Keu areñi bohonñi mi kapañkölköl. Polnön mi jim asariba uruñi nañgöba qambañi kewö wañgiba ohoyök: Timoti göñön mönö pöndañ kinda Jisös Kraistkö könañi nañgöba jiba malman. Ölöwak Buña aka Jöhöjöhö Areñ Walñi mötzani, mönö miangören qekötahöba miangö keuñi ölbölñi mi ambazip kusum engiba urukungukungu nup memakñan. Tuarenjoñ ak gihigetka sihimbölö könañi könañi miwikñaiba mötpanak ewö, mönö töndup Anutunön nup gihiyöhañgö dop mi kapañ köla memakñan.

Polnön galöm meme keu köhöikñi Timoti kewö wañgiyök: Tosatñan “gukmaulem qakñe añgururuk omañi aka kezapjupjup ahakzei,” göñön mönö miangö keunön añgota nalögi mösöhöba ayuhubanbuk. Añgururuk keu mewöñi mienön ambazip qahöpmahöp bauköm engimakzemö, ambazip kezap ala mörakzei, mönö i mem bölim engiiga ayuhume.

Polnön qambañ keuñi pakpak nañgömangöra nanñi malmalñangö kösohotñi ohoyök. Wuanöñgöra aka denöwö nup areñi ala bim qeba malöhi, Timotinön miangö keuñi ölum qebapüköra

mi kewö jim asariyök, “Nöñön Jisös möt nariba lömböt möta mökösoñda urukalem aka malal. Sesewerowero ak niñgigetka sihimbölö möta kapañ köla köhöiba kinal.”

Buk kiangö bahöñi bohonñi 5 mi kewö:

Keu mutukñi 1.1-2

Anutu möpöseiba Timoti qambañ wañgiyök 1.3-2.13

Goro aka galöm meme keu tosatñi 2.14-4.5

Pol öröm ureim ak wañgigetka malök 4.6-18

Kimbigö keu kötñi bohonñi 4.19-22

¹ Anutunöñ jitsihitñi jim kutuba Pol ni kuñgum niñgiiga Kraist Jisösgö aposol akzal. Kraist Jisösbuk qekötahöba kininga malmal köhöikñi neñgimapkö keu jöhöyöhi, miangö Buña keuñi jim asarimamgöra melaim niñgiiga maljal.

² *Timoti göñön mötnaripkö wölböt nahöni akzan. Nöñön göbuk keu eraum mötpitköra kimbi ki ohozal.

Iwi Anutu aka Kembunini Kraist Jisös, yetkön mönö ak kömumba kalem möriam gihiyohotka lu-ainöñ malman.

Polnöñ Timoti uruñi nanğöba keu jiyök.

³ Nöngö ambösakonan Anutu welenñi qeba malgetka nöñön toroqeba nupñi membiga Anutunöñ “Dop kölja,” jiiga urukezapnan mewö mörakzal. Uruni sarakñi aiga Anutu möpöseimakzal. Möpöseiba suñgem asak köuluköba gi qösösök mötmörim gihimakzal.

⁴ Gömosötpiga sahötnöñga imbilgi eröhi, nöñön mi mötmöriba gekñamgö awöweñgöba kapañ

* 1:2: Apo 16.1

kölakzal. Geka köisirik tatziga sösöngainöŋ uruni kokolak qemapköra mötzal.

⁵ *Göŋön geŋmoŋ qahö ölna Jisös möt nariba maljani, keu mi urukönömne ahöiga mötmörimakzal. Mutuk abugi Lois aka namgi Yunis yetköŋ uruŋiri melenohotka mötnariŋiran ahuyök. Yetkö andöŋire göŋön mewöyök aka maljani, mewö möt narim köhöizal.

⁶ Miangöra ikmaok malbanbuköra keu kewö köl gulim gihizal: Nöŋön mutuk böröni nöropke ala köuluköbiga Anutunöŋ nup memegö mötmöt kalem gihiiga uruge ahözawi, mi mönö mem gulinöŋga könöp bölam ewö köhöiba jeba qahö ilin alma.

⁷ Keu ki mötmörinöŋ anök: Anutunöŋ Uŋa Töröŋi mi ziriŋziriŋ aka qarösömbu mötpingöra qahöpmö, nanŋi kukösungö Uŋaŋi neŋgiiga ölop uruninan jöpaköm aŋguba ahakmemenini törörök galöm köl aŋguba kinbin.

⁸ Miangöra Kembuninaŋgö keuŋi naŋgöba jim sehimangö taŋqaŋ kude akŋan. Mewö qahöpmö, mönö ni ewö aka malman. Nöŋön Kembangö nupŋi memba malbiga miangöra kösö mire al niŋgigetka tatzalmö, töndup nöngöra aka gamu kude möta malman. Mönö köhöiba ni ewö awösamkakak kinda urugö nup memba malman. Ölöwak Buŋagöra aka aŋgösirip ak gihibeak ewö, mönö miangö sihimbölöŋi möta mökösoŋda bisiba malman. Anutunöŋ kukösum gihimakzawangö dop mi ölop nömbuk mohotŋe kapaŋ köla bisiba malbit.

⁹ Anutunöŋ möpŋaŋgö möpŋe Suep gölme qahö miwikŋaim etkiba nalö miangöreŋ neŋgöra

* 1:5: Apo 16.1, 11; 1 Tim 2.7

mötmörriba areŋ kewö alök: Anutunöŋ Kraist Jisösgöra aka kalem möriam neŋgima. Areŋ mi ali ahöiga mala kota malgetka nini ahuin. Ahuinga Anutunöŋ nini yaŋgö buŋaŋi aka sarakŋi malbingöra neŋgohola amöt qem neŋgiyök. Naninak yuai ölopŋi ahinaŋgöra aka qahö möwölöhöm neŋgiba neŋgoholökmö, nanŋi areŋ walŋi mi wuatangöba kinda neŋgoholök.

¹⁰ Areŋ walŋi miangö ölpŋi mi nalö kewöŋe aukŋe asuhuyök. Amötqeqe Toninan asuha Anutugö kalem möriamŋi mokom neŋgiyök. Kraist Jisösnöŋ asuha kömupkö ösumŋi qeba tulumgöi eriga Ölöwak Buŋaŋi indeliga asariyök. Buŋa keu mi möt nariba ölop malmal kömbönaŋi miwikŋaiba teteköŋi qahö köhöiba mala nalö kunöŋ qahö kömum köhöibin.

¹¹ Anutunöŋ ni Ölöwak Buŋa jim asariba ambazip kusum eŋgimangöra kuŋgum niŋgiiga melaimelai azi aposol akzal.

¹² Aposol akzalaŋgöra aka nupŋi köhöiba membiga aŋgösiripŋi bisiba sihimbölö mörakzal. Suep Azi möt narim waŋgimakzali, nöŋön yaŋgö könaŋi ölop möt yaközal. Miangöra awösamkakak kinda gamuni qahö mörakzal. Qahö! Anutunöŋ möt narim niŋgiba Buŋa nupŋi al niŋgiyöhaŋgö dop ni galöm köl niŋgimapkö köhöiba malma. Mewö maliga nupŋan qahö sohoba eriga mal öngöba nalö ketaje aŋgotpin. Mewö möt narim köhöizal.

¹³ Mötnaripkö keu urunini möhamgömapkö köhöizawi, nöŋön keu ölpŋi mi kusum gihiba silik ölopŋi kondel gihiba malal. Mi mönö uru könömge ala wuatangöba malman. Nini Kraist Jisösbuk

mohot kininga jöpaköm neŋgimakzawi, göñön mönö urukalem mianjö uruŋe malman.

¹⁴ Anutunöŋ geke möt narim gihiba yuai ölöŋŋi pakpak gihiiga buŋagi akzawi, mianjön lolonqalon aka sohobapuköra mönö mi galöm memba malman. Uŋa Töröŋan urunine kinda maljawi, mönö yaŋgö kukösum qakŋe yuai ölni mi galöm kölnöŋga kahaimök ahöma.

¹⁵ Eisia prowinsgö neŋakurupni yeñön körek nömosöta andö nuŋguget, mi mötzan. Azi qetŋiri Figelus aka Hermogenes yetkön yeŋgö sutŋine maljahot.

¹⁶ Tosatŋan nömosötkekmö, Onesiforus yañön qahö. Mianjöra Kembu, gi mönö Onesiforusgö saiwaurupŋi ak kömum eŋginöŋga malme. Azi mianjön mönö nöŋgö tapepnaŋgöra (muŋgamuŋga) sisit gamu qahö ak niŋgimakzapmö, nalö gwötpuk mianjöreŋ körö-ölöwak qem niŋgiiga imbini böñjön kölök.

¹⁷ Onesiforusnöŋ Rom sitinöŋ ki kaŋgota nalö mianjöreñök nöŋgöra kapan köla jaruba mala miwikŋaim niŋgiyök.

¹⁸ Yañön mutuk Efesus sitinöŋ denöwö baukbauk ketanji ketanji aka mem amqem niŋgiba malöhi, mi nangak ölop möt kömuzan. Mianjöra nalö ketane Kembugö qöhöröŋe aŋgoringa Onesiforusnöŋ ak-kömükömugö töwanji miwikŋaimapköra köuluközal. Mewö.

2

Kraist Jisösgöra mönö bim qeba malman.

¹ O mötnarip nahöni Timoti, gi mönö Kraist Jisösbuk qekötahöba kalem möriam uruñe böñ qeba köhöiba kinman.

² Nöñön Buña keu kusum gihibiga gwötpukñan neka nañgöba jiget mötnöñi, mi ambazip möt narim enjiengigö dop akzei, mönö yeñgö buñaya ahömapköra al enjiman. Mewö al enjinöñga ahöi ölop ambazip tosatñi toroqeba kusum enjimeañgö dop akñe.

³ O Timoti, gi mönö Kraist Jisösbuk kinda yarö aziñi aködamunñambuk aka kapañ köla köhöikñanök bim qeba malman. Anğösirip ak gihimei, miangö sihimbölöñi mönö möta mökösoñda bisiba malman.

⁴ Yarö azigö tandökñi kewö: Suahö galöm bohonñinan azi enğömeiga yarö kambugö areñnöñ anğota anda kaba nup töp memba maljei, yeñön mönö körek galömñinan jim kutumakzawañgö dop tem köla akingö jöjöröba kinje. Mewö kinda nanñini malmalgö nañgönañgögöra yuai kun qahö memba malje. Uru deñqeq qahö malje.

⁵ Miangö dopkeuñi kun kewö: Mönahot anğolat azinöñ aonğitnöñ anğota jimkutukutu galömgö keuñi onğita ösumñan lañ anjawi, yañön mönö aködamunñambuk qahö akña. Yañgö nörorñje luhut alalgö ila kun qahö kölgetka gema. Miangöra gi mönö diñdiñanök anman.

⁶ Mewöñanök kölkömöt azinöñ nup lömbötñi meiga ölni asuhuiga mutuk anda jeñi qeba neiga dop kölma. Tosatñan löwörigeri, yeñön yañgö andöñe kame. Gi mönö miangö dop köhöiba nup memba malman.

⁷ Keu ohozali, mi oyoŋnōŋ lömböriiga Kembunōŋ mönō mötkutukutu gihüiga mi pakpak ölop möt asariman. Mianğöra mi mönō uru könömge ala mötmöriba malman.

⁸ Mönō Jisös Kraist mötmöriba malman. Nōŋön Ölöwak Buŋa jim asarimakzali, Jisösnōŋ keu mianğö dop kiŋ Deiwidkö gwölönarökŋa ahuba Amötqeŋe Toŋi aiga Anutunōŋ mem gulii kömupnöhök wahörök.

⁹ Nōŋön Ölöwak Buŋa keu kapan köla jim asariba anğösiripkö sihimbölöŋi mötpiga kegwek-kahasililiŋ azi ewö kösö gwarö mem niŋgigetka tatzal. Mewö tatzalmö, Anutugö Buŋa keuŋi mi mönō qahö jöhöba gwaröhöget.

¹⁰ Könaŋi mianğöra aka nōŋön sihimbölö pakpak möta mökösoŋda köhöiba kinjal. Anutunōŋ ambazip nanŋaŋgöra möwölöhöm enğiyöhi, nōŋön mönō yeŋgöra aka kapan köla bim qeba maljal. Kraist Jisösnōŋ amöt qem enğii yeŋön mewöyök letota oyaenğoyaenğ akŋegöra mötzal. Uruŋini melenğda malme ewö, mönō Suepkö asakmararaŋnōŋ öngöba teteköŋi qahö köhöiba mala mal öngöme.

¹¹ Keu ki mönō pöwöwöm köhöikŋi akza, “Nini urunini walŋan yambuk mohotŋe kömui maljin ewö, mönō mewöŋanök yambuk köhöiba malbin.

¹² *Yambuk mohotŋe sihimbölö möta mökösoŋda maljin ewö, mönō mewöŋanök yaŋgö bemtohoŋ uruŋe yambuk galömkölköl akin.

* **2:12:** Mat 10.33; Luk 12.9

Nini i qan köljin ewö, yañön mönö mewöñanök qan köl nenğiba nenğehöröñ kölma.

¹³ Nini andö qem wanğiinga likepñi melen nenğimapkö keu jöhöi ahözawi, yañön mi qeapkömamgö osima.

Mindiñqindiñ aka nanñi könañi utekömamgö qötötañgömakza.

Miañgöra peksek aka keunini pöndañ qahö wu-atañgöbin ewö, yañön mönö töndup (misila) keuñi pöndañ wuatañgöba miañgö dop ak nenğima.” Mewö.

Anutugö Buña nup azi kewö aka malman:

¹⁴ O Timoti, keu ki ölum engubapüköra mi mönö jim gulim engiba Anutugö jemesoholñe kewö jim kutum engiba malman: Mötnaripkö keu imbiñi imbiñi mi mönö melenqelenđa möndömkösök kude akñe. Jitnakölik mönö qahöpmahöp bauköm nenğimakzapmö, tosatñan goranora keu mewöñi möta enjololonj aketka mötnaripñinan sohoi ayuhubepuk.

¹⁵ Göñön mönö Buña nupkö esapesap könañi könañi mi luhut alnöñga Anutunöñ geke “Dop köljan,” jimapköra kapañ köla kinman. Gi Kraistkö nupköra gamu kude möta malmanmö, Buña keu öñji mönö törörök mendenđa uruñini kungum engiba malman.

¹⁶ Gölmegö keu oyoñdewedewet omanñi omanñi mi mönö yaköriba andö qeman. Tosatñan mi sehiba jiba mala mewö miañön gölmegö añgöjörakñe qekötahöba Anutu toroqeba nönöñgan aka kahapmahap ahakze.

17 Uzi köhöikñi (qetñi kensö) mianjon busu siribuk qem qariba yöhöba anakzawi, yejon mianjö dop keu omañi jiba mianjon ambazip mem bölim engimakze. Yeñgö kambunöñ azi yahöt qetñiri Himeneus aka Filetus maljahot.

18 Yetköñ keu ölñanjö könañi mosöta janjun aka keu sinñi kewö jimakzahot, “Urumelen ambazip nejon lök guliba wahöta maljin. Mianjöra könañep kömupnöhök kunbuk qahö guliba wahötpin.” Mewö jiba tosatñi enololon mem engyohotka mötnaripñinan bölimakza.

19 *Mewö bölimakzapmö, Anutunöñ tandö pöwöwöm köhöikñi kuñguyöhi, mianjon mönö töndup qahö uruba kinja. Mianjö muñgemñi mi kewö ohoget ahöza, “Kembunöñ nanñi buñani akzei, mi ölop möt kutum engiza.” Muñgemñi kun kewö, “Ambazip Kembugö qetñi memba qetzei, yejon körek mönö ahakmeme bölöñi qem yaköriba malme.”

20 Miri ketanji mianjören jout, kimbut, alnene, umnene könañi könañi ahöza. Tosatñan ipnöñ aka gwaköm gölmenöñ memenji, mi nalö dop memba nupnöñ alakzin. Tosatñan goul aka silwönöñ memenja. Aködamunñinambuk mewöñi mi sösongai nalöneyök nupnöñ alakzin.

21 Mianjö dop kunñan keu omañi mosöta nanñi köl köñjorat mem anğuzawi, yanjon mönö kimbut goulnöñ memenji kun ewö akña. Tonjan i memba nup aködamunñambuknöñ ali memakña. Mi meiga töhötmöriamñambuk aiga Ketanñanjan yanjöra söngaimakña. Anutunöñ mem sarahim wanjiiga

* 2:19: Jan 16.5

titingitnji kinda nup ölöpnji pakpak memamgö jöjöröba kinma.

²² Sepguli malmalgö sihim kömbönanji bölönan galöm ak ghibapuköra mönö galöm mem anğuba malman. (Nupkahö ölnan etpapuköra mi jizal.) Esapesapnöñ öröm gihimakzei, mi mönö qiz-ingöba andö qeba malmal kewöñi malmangöra kapan köla malman: Ambazip uru sarakñangö qakñe Kembu bauköm engimapköra qerakzei, yembuk mönö ahakmeme diñdiñi wuatangöba Anutu törörök möt nariba ölna jöpaköm anğuba luainöñ malme.

²³ Tosatñan kezapjupjup keu jiba oyoñdewedewet ala jitnakölik aketka goranora anğururuk asuhumakza, mi ölna mötzan. Mianğöra mi mönö yaköriba andö qeba malman.

²⁴ Kembangö nup meme azi akzawañön mönö anğururuk akñawañgö dop qahöpmö, ambazip körek guñböñjñöñ qakñe ak engiba amqeba kusum engiba malma. Anğösirip ak wañgigetka mi köhöiba mököşöñda malma.

²⁵ Tosatñan tuarenjñ ak wañgigetka i ölöp uruluai qakñe mutulañgöba mindingöm engimakña. Mewö ak engiiga Anutunöñ uru mölöwörim engiiga ölöp Buña keu möt kutuba uruñini melenbeak.

²⁶ Tuarenjñ ambazip yeñön Bölöñi Tonangö mötöp simbanöñ tötökögetka gwaröhöm engii jitñi tem köla ahakze. Mewö aka imbiñini möta urumötmötni ahuiga yañgö kösönöhök lolohoba etpeak. Mewö.

3

Nalö teteköñe malmal böliba anğöjörakñambuk

akɲa.

¹ Keu kötɲi ki mönö möt kutuba malman: Jisös kaka nalönan töriiga ambazip könaɲamɲinan böliiga teteköɲe malmal kanɲamɲambuk kewö asuhuma:

² Ambazipnöɲ nanɲinaɲgörök mötmöriba monen yuai girinɲabak membagun membingö nepaqepalok (gridi) köpösöɲgömakɲe. Silenini möpöseiba korua ewö ginginɲini töröreiba söɲgöröqök mala uruqeɲe keu töhöreɲ laɲ jimakɲe. Iwinamɲini yeɲgö jitɲini qahö tem köla yuai ölöɲnaɲgöra saiwap qahö jiba nemsep-pamsep (nem-hölölök) ahakɲe. Anutugö nesampurek nönöɲgan ahakɲe.

³ “Nanɲi lömböra,” jiba wösö mötmöt qahö ahakɲe. Tosatɲi yeɲgö siɲgisöndokɲini qahö mosöta miangö urubölöɲi bisimakɲe. Andöqeɲe keu yöhösaɲ jiba nanɲini qahö galöm köla aɲguba ambazip lapköba öröm ureim ak eɲgimakɲe. Ahakmeme ölöɲni tököba miangö ölan eɲgöhömakɲa.

⁴ Mamalolo aka nanɲini imbi-imbi wuatangöba jaubatbat ahakɲe. Söɲgöröqök mala jakbak-öraɲböraɲnöɲ uruɲini uwutapköiga urukönöp ahakɲe. Silegö sihim sösoɲgainaɲgöra gwötɲuk ak eɲgiiga Anutugöra mötket eretɲi aiga göragöra ahakɲe.

⁵ Anutugö Buɲa nup bahösapsap bisiba silebile memba Sonda areɲ laɲ wuatangöba möndömakzemö, ahakmemeninan Anutugö kukösümü mi je köndat qeba qaɲ kölakze. Ambazip mewöɲi mi mönö jabö ala qizingöba andö eɲguba malman.

⁶ Yengörenök tosatñan lañ liliköba ambazip miriñine öngöba kelök keunöñ uruqeçe mem engiba kezapñini kumbaumakze. Kumbaugetka ambi tosatñan löwöriba yengören qekötahömakze. Ambi siñgisöndokñinañgö gamugöra et enğuiga sihim kömbönañini könañi könañi mienön yeyasenşen mem engigetka siksauk akzei, yeñön i bawian mönera aka köpeim engigetka keu mötöpñine et engumakza.

⁷ Ambi mewöñi mienön möt lömböriba sundan keu kusum engimegö möndöba mörazzemö, Buña keu ölnañgö könañi mi nalö dop möt kutubingö osimakze.

⁸ *Ijpt kantrigö tirip qözölgözöl azi qetñiri Janes aka Jambres yetkön Moses tuarenjon ak wañgiyohot. Takapulaka ambazip yeñön mietkö dop Buña ölnañgö tuarenjon ahakze. Ambazip mewöñi yengö mötmötñinan sohoiga kahapmahap akzei, mienön Anutunöñ mötnaripñini esapköi et enğuiga Kembubuk kinkinñinan söreima.

⁹ Nalö töröpñi silenini memba öngömemö, nupñinañgö ölni mi nalö qahö köriiga pömsöm qema. Ijpt azi yetkö könañamñiran aukñe asuhuyöhi, yengö uruqahöpñinañgö könañan mönö miangö dop aukñe asuhui ambazip köreñan ek asarime. Mewö.

Polgören jimkutukutu keu teteköñi

¹⁰ Yengören mewö asuhumapmö, nöñön malmalnañgö tohotñi murutñi kuñguba areñ alal. Ambazip Buña keu kusum engiba ahakmemeni aka memba malali, göñön mi lök eka möt

* **3:8:** Eks 7.11

kömuzan. Malmalnangö tohotnji wuatangöba mötnaripkö kölguliguli pöndañ memba sihimbölo mökösoñda malali, miangö kösohotnji jiba jigetka möt sölöngözan. Urumelenj alaurup urunan jöpaköm engiba malal. Tuarenjonj angösirip ak niñgigetka miangörenj kapanj köla köhöiba kinda malal.

¹¹ *Sesewerowero kahasililinj könañi könañi ak niñgiba malgeri, mi mötzan. Antiokia, Aikoniam aka Listra taon karöbut miangörenj sihimbölo nöngö qakne öngöiga wahöjalinj mörali, mi yuai kanjamñambuk ahök. Iwinangö jitñi! Angösirip mökösoñda bisiba malalmö, Kembunöñ mi pakpak miangörenjök meköm niñgiyök.

¹² Keu ki mötnöñ: Ambazip Kraist Jisösbuk mohot kinda malmal köhöikñi mala miangö kölguligulini akingö mötzei, yeñön körek sesewerowero miwikñaime. Ni angösirip ak niñgiget ewö, tosatñi inini mewöyök ak engime.

¹³ Tirip qözölgözöl ambazip bölöñi Buña nup silesile memba öñömböböp akzei, yeñön toroqeba bölimqölimakñe. Yeñön ambazip tosatñi tilipköm engiba nanñini mewöyök tilipköm anguba malme.

¹⁴ Yeñön mewö malmemö, Timoti gi Buña keu ölni möta uru könömge ala möt narim köhöizani, mönö miangörenj toroqeba böñ qeba kin köhöiba malman. Denike yeñön kusum gihigeri, göñön yeñgö könañamñini möt kutuzan. I möt narim engizanañgöra mönö Buña keu töp memba kude sööräuba mosötman.

¹⁵ Urumelenjögö Buña Kimbi Töröñi mi morökötkeyök möt sölöngöba mala kotzan. Göñön

* **3:11:** Apo 13.14-52; 14.1-20

mönö mi oyoŋda mötmörinöŋga mötkutukutugi asariiga mianğö qakŋe kinda Amötqeqe Toŋaŋğö könaŋi möt asariman. Mi möt asariba Kraist Jisös möt narim waŋginöŋga amöt qem gihiiga toroqebe letota malman.

¹⁶ Anutunöŋ Buŋa Kimbigö keuŋi pakpak mi ambazip tosatŋi sölölöhöm eŋgii ohogetka kewö mem ölöwak neŋgimapköra aka ahöza: Mi oyoŋninga Anutunöŋ urunine sölölöhöba köna ölni kusum neŋgiba bölöŋamŋinaŋğöra tembula jim neŋgiba mindiŋgöm neŋgimakza aka malmal solanŋi malbingöra goro neŋgiba köl gulim neŋgimakza.

¹⁷ Anutugö ambazip neŋön mi oyoŋda köl guliba Anutu jitŋaŋğö dop köhöiba aködamininambuk aka nup ölöŋni pakpak membingö jöjöröba malbin. Mewö.

4

Polnöŋ nupŋi undumŋi Timotigö qakŋe alök.

¹ Kiŋ Kembunini Kraist Jisösnöŋ asuhuba jebuk malbini me kömumba ahöbini, neŋgö keunini kewöta jim teköba tosatŋi nini bemtohoŋe ala galöm köl neŋgima. Nöŋön Jisös mi aka Anutu yetkö jemesoholŋire kinda gi urugö nup memaŋğöra jim kutum gihizal. Mi wuatangömangö jiba keu mi jöjopaŋ keunöŋ jöhönöŋga mötŋi dop kölma.

² Kewö jim kutum gihizal: Göŋön Buŋa keu jiba ambazip uru kuŋgum eŋgiba malman. Mötmegö nalöŋini dop köl eŋgiza me qahö dop köl eŋgiza, mönö töndup kapaŋ köla wahöta keu jim asariba malman. Ambazip bölöŋamŋinaŋğöra jim eŋgiba mindiŋqindiŋ aka galöm meme keu jiba uruwahöt keu eŋgiba malman. Keu mötme me qahö mötmea

kun, mi töndup mönö mököşönda kinda köna ölni nalö dop kusum engiba malman.

³ Neñön mötnaripkö keu nalö kewöñe ambazip ölöwakñegöra kusum engimakzinmö, nalö murutñi kun kam kuñguiga miangören mötnaripkö keu kemañi kun mötpepuköra tököba kezapñini gwözöñ akñe. Keu murutñi murutñi mötpingö kezapñini köröpñi köröpñi aka aziña azi sesegilgil öröm engigetka kaba ambazip keu i me wai mötpingö sihimñi mötzei, miangö dop kusum engigetka malme.

⁴ Mewö mala Buña keu ölni mötpinbuköra nönöñgan aka kezapñini gwözöñda bem sambañi sambañi lañ jiji jimakzeangören göröken melenña mi kezap ala möta malme.

⁵ Malmal mewö me mewö uteköba asuhumawi, Timoti gi mönö töndup böñ qeba zeñ kinda ahakmemegi törörök galöm köl anguba malman. Angösirip ak gihimei, miangö sihimbölöñi mönö mököşönda bisiba malman. Urukunğukunğu (ewanjelis) azigö nup areñ mi körek dop köla mem teköman.

⁶ Nalö köröpñi bauköm gihimangö osimamangöra mewö jizal. Tandö lopion möpöseibingöra sömbup qeba jakenöñ ala ohogetka köwaknöñ öngözapma. Miangö dop nöñön malmalni Anutugöra ala kölenña nupñi memba malalangi gawman yeñön keuni jöhöba nuñgugetka nani sepni mokomangö dopdowizal. Gölme ki mosötmami, miangö nalöñan lök kam kuñgumangö dopdowiiga mötzal.

⁷ Mönahot angolat azinöñ ösumtiti aongit nalöñe luhut almangöra ösumñi pakpak qezaköba tiba

anjawi, nõnõn miangö dop mötnarip köl guliba aongit aködamunambuk ak teközal. Kraist möt narimangö keu jim jöhöyali, mi qahö köyatiba qan kölalmö, miangö bimñi mönõ pöndañ köhöiba qeba malal.

⁸ Kembunõñ jimtekötekö Tonji diñdiñi aka malmalni kewöta solanñi aka malali, miangö ila soromñi mi jim teköm niñgiiga nõngö mamböt ahöza. Kembunõñ lilingöba kamawi, nalö miangören mi niñgiba imbine köli geiga qetbuñanambuk akñam. Mi nõngörök qahö niñgimapmö, ambazip jöpaköm wangiba kunbuk asuhumapkö al mambörakzei, mi yengö imbinjine mewöyök köli gem enjima. Mewö.

Neñakurupnan nõmosöta qeñgalanğa kölget.

⁹⁻¹⁰ *Nalö kewöñe gölmeğö ahakmeme aka memakzei, neñakni Demas yañõn uruñi miangören jöhöba nõmosöta Tesalonaika sitinõñ anök. Neñakni Kresens yañõn Galesia prowinsnõñ anök. Taitusnõñ Dalmesia gölmenõñ anök. Miangöra gi mönõ zilañ nõngören kamangö kapan kölman.

¹¹ *Luk yañõn nanñök nõmbuk maljit. Maknõñ welen qem niñgimapköra gwötpuk möta yañgöra osizal. Miangöra Mak wangita mohotñe kamahot.

¹² *Neñakni Tikikus melaim wangibiga Efesus sitinõñ anök.

* **4:9-10:** Kol 4.14; Flm 24; 2 Kor 8.23; Gal 2.3; Tai 1.4
4.14; Flm 24; Apo 12.12, 25; 13.13; 15.37-39; Kol 4.10
20.4; Ef 6.21-22; Kol 4.7-8; Apo 20.6

* **4:11:** Kol
* **4:12:** Apo

13 Troas taonöŋ mala malukuni azi qetŋi Karpus yaŋgö mire mosörali, mönö mi memba kaman. Mewöyök kulem lama sileŋe ohoba lipiŋeri, nöŋgöreŋ lama sile mi mönö kapaŋ köla meman aka miangö andöŋe buk tosatŋi mi mohotŋe memba kaman.

14 *Aleksander, silwö kopö ohom qeköqekötahö azi mötzani, yaŋön bölöŋi könaŋi könaŋi gwötpuk ak niŋgiba malök. Kembunöŋ ahakmemenŋi kewöta miangö dop likepŋi melenŋ waŋgiiga qakŋe öŋgöi sihimbölä mötmawi, mi mötzal.

15 Yaŋön keuninaŋgöra gwötpuk tuarenŋonŋ ak neŋgiba malök. Miangöra gi mewöyök mönö yaŋgöra galöm mem aŋguba malman.

16 Indim mutukŋi kutukutulaŋ keu jake bohonne al niŋgigetka keuni likepŋi jibiga kunŋan kun qahö kaba ni naŋgöm niŋgiba jiyökmö, alaurup pakpak yeŋön buratiba nömosötket. Anutunöŋ siŋgisöndokŋini miangö likepŋi qakŋine al-bapuköra köuluközal.

17 Yeŋön nömosötketmö, Kembunöŋ bauköm niŋgiyök. Nöŋön Buŋa keu jiba ambazip uru kuŋgum eŋgiba nup mi körek mem tekömamgöra aka mem köhöim niŋgiyök. Kantri pakpak yeŋön Buŋa mi mötmegöra möta bauköm niŋgiba laion sömbup kalŋi yeŋgö numbuŋine gil niŋgibepukö aŋgön köla jitŋineyök meköm niŋgiiga eral.

18 Kembunöŋ bölöŋi könaŋi könaŋi mem niŋgibepuköra meköm niŋgiiga ölop Suep bemtohoŋaŋgö uruŋe eu öŋgömam. Kembugö qetŋi mönö sundan möpöseininga nalö teteköŋi

* 4:14: 1 Tim 1.20; Sum 62.12; Rom 2.6

qahö aködammunꞋambuk aka ahöba öngöma. Keu mi ölja.

Yaizözkök keu teteköꞋi

19 *Gi mönö nöngö yaizözkökni Prisila aka apꞋi Aqila yetköra aka Onesiforusgö saiwaurupꞋi yengöra jinöꞋ mötme.

20 *NeꞋakni Erastus mosötpiga Korint sitinöꞋ malja. Trofimius i Miletus sitinöꞋ mosötpiga kawöl yöhöi ahöza.

21 Miangöra kömunjan kie uru nalö qahö kaiga mönö bapꞋe kiangöreꞋ nöngöreꞋ kamangö kapꞋan kölman. Azi qetꞋini Yubulus, Pudens, Linus, Klodia aka urumeleꞋ alaurup pakpak yeꞋön yaizözkökꞋini jiba algetka göhöreꞋ kaza.

22 O Timoti, KembunöꞋ unꞋagi kötuatköba göbuk kinma.

Anutugö kalem möriamꞋan mönö embuk ahöma. Mewö.

* **4:19:** Apo 18.2; 2 Tim 1.16-17
Apo 20.4; 21.29

* **4:20:** Apo 19.22; Rom 16.23;

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e